



Nunatta pissarititaanik inuussutissanik nunatta avataanit eqqussun-neqartunik akimikkut unammillersinnaasunik qanoq ililluta nerineru-lernissarput angussinnaavarput. Nunanik allaniit inuussutissat eqqussorneqartut CO2-mik migutsitsinermut akileraarusersorneratigut nunatta iluani inuussutissanik siammaaneq akikinnerulersissinnaavar-put, aqqutissat allat orniginartut suusinnaappat.

(Inatsisartunut ilaasortaq Ane Hansen, Inuit Ataqatigiit)

Demokraatini eqqumiigaarput, siunnersuut manna saqqummiunneqarmat partiimi socialistiskiusumi ilaasortamit. Nunat akornanni isumaqatigiissutit eqqarsarluarsinnaanerlu immineerlugit nioqqutissiat nunamut eqqussat akitsuusersulissagaluarutsit akit qaffassapput pissakinnerusullu eqqorneqarlutik.

Kalaallit Nunaanni nunalerineq avannarpasippallaarpoq taamaattumik akisuallaarpoq qaqugumulluunniillu nunani kujasinnerusuni nunalerisunut unammillersinnaalernaviaratik. Akitigut, annertussusikkut aamma CO2-mi naatsorsuutit eqqarsaatigalugit.

Kalaallit inuussutissaataat suliffissuaqarfinnik tunngaveqartunut naasorissaasunut unammillissappata taava pitsaassuseq unammillerfiusariaqarpoq. Kalaallit inuussutissaataat iluamik suliat nallerneqarsinnaanngillat.

Taamaattumik Naalakkersuisut isumaqatigaagut oqarmata sumiiffimmi tunisassiat inuussutissat atorluarneqarnerulissappata taava pisariaqartoq tunisassiornermik siuarsaanissaq, pitsaasunik nutaanik peqqinnartunillu nunatsinneersunik tunisassiorsinnaalersillugit.

Taamatut oqarluta IA kaammattussavarput pissakinnerusut eqqarsaatiginerulaaqqullugit, siunnersuusiuleraangamik.